

Nitu Sisdang I Bunun

Uka'anang a hubuq tamasaz kan'anak miqumis a, siang intaa tina ka sisdangun. Aupa indangazanang aingka masasngaq mapakaun, mapalingqaul, sauhaan maqtuin aingka kan'anak mudadaan, kan'anak maun qaising, quud danum.

Laupakadau aak a, isnavaan haan Kucuung, sisdangang inaak tamatina, naita masaiv zaku sui pavingkiu, mapakaun zaku. Sauhaan maqtuin aak kan'anak sikakaun ank'anak.

Sintupa ka sisdang un tu uka'anang laupakadau qansaipan siin tamasaz, asang dau tu indangazan i haiza'an qansaipan siin tamasaz tu bunun. Napanlakuaq ata niin tu sisdang bunun i? Uka bunun maqtu mapitqas taqu mita, kaupa isuu is'aang maqansiap tu kasququaquin.

Makuaq dau ka tina ki uknav masnava isiata luqai'az, a na tudiipin aingka kan'anak'anak miqumis? Maaq i tasbananin a ispasaipuk tu qani'anan a, kivunang tina ta isdamu ki nakaunun luqai'az ta. Tunganin maun a havununin tina ta luqai'aza mapudaan, ni'in a tina mapakaunan isiata tu dinamun. Aupa inisnavaanin aingka istaa, haiza'anin qansiap siin tamasaz saipuk anak'anak.

Mastaanang ata bunun pakasia uknav tun tu mataiklas daingaz. Maqtu ata isnavaan i istaiklasan tu bunun, mapasnava ki maqaqansiap tu bunun.

Miliskina tu makuaq a uknav miqumis? Ukain a tina sikakaun intaa, maaq i nitu kan'anak sinap i titi, kan'anak madamu ki titia, namuqa'in ainka mitkuas.

Ilumaq sisdang ata tamatina siin masisituqas, ihaan ka'ku sia mita sinsia sisdangun, inata sia mita kaviaz sisdangun. Mavia ata tu na asa sisdang intaa i? Tis'uni tu niang ata maszang intaa tu haiza'an taiklas siin tamasaz. Nahaiza tu qanian, uhaiza'anin ata amin taiklas siin tamasaz a, maqtu'in ata kan'anak kuzakuza, saipuk anak'anak. Niin tu sisdang duma bunun.

Maaq i uka'in mita sisdangun a, minpising ata tutupa, maszang uvaz'az ihaan daandaingaz unghavan i tamatina, muqain aipa untini'an paimangmang tangis. Muqa tu madia ka mintinalu tu uvaz'az, uka'in a tamatina. Muqa'in aingka minkalat nipun kan'anak miqumis, uka intaa maqtu sisdangun miqumis inastu ti. Kan'anak aingka saipuk anak'anak.

Maisna'iti ata minqansiap tu, maaq i nitu sisdang bunun a, asa tu haiza'an busvit, mazima mapasnanava kivaivivaivi tu qansiap, maqasmav kuzakuza, madundung a is'aang, sisasaa ka is'aang; nitu mapising, nitu mahau hiqinun, muliva a, nitu mapising kaqna anak'anak tu dikla.....

115 年全國語文競賽臺灣原住民族語言朗讀文章 【丹群布農語】 國中學生組 編號 3 號

成為獨立自主的人

嬰孩要依賴母親，要人餵食，洗澡，直到能夠站立走路、自己吃飯、喝水為止。受教育要倚靠父母，直到自食己力。在家靠父母兄弟，在校倚賴老師和同學，在外靠朋友。有遭一日，我們也會具備智慧和能力，可以獨立工作，照料己身，不再依賴他人。沒有倚靠的人，好比孩子走失，只能坐在地上大哭一場。許多孤兒，沒有父母在身旁，只能咬緊牙根自立生活。

「若幫助了別人，就把它忘了；若曾被別人幫助過，要牢記著，必須要回饋他。」。